



Uunga: Hans Enoksen, Naleraq
Inatsisartunut ilaasortaq

§ 37 naapertorlugu apeqqummut nr. 167-2024-mut akissut

Inatsisartut Suleriaasianni § 37, imm. 1 naapertorlugu Namminersorlutik Oqartussat ingerlatseqatigiiffiutaanni ammasumik ersarissumillu eriuseqarnissamut tunngasunik apeqquteqarputit. Apeqqutigineqartut tullinnguuttuni akineqarput.

26-09-2024
Suliap normua: 2024 - 99
All. normua. 24356916

Postboks 1015
3900 Nuuk
Oqarasuaat (+299) 34 50 00
Fax (+299) 32 50 02
Mail: govsec@nanoq.gl
www.naalakkersuisut.gl
|

Apeqqut 1. KNI A/S, suliffeqarfiit inuiaqatigiit pigisai allat assignagit, "allaffeqarfissuarmini" atorfeqartut amerlassusaannut sooruna akissuteqarne-rattuut "pissutsit tunngaviusut patsisigalugit" paasititsiumangillat (§37 apeqqut, nr. 141-2024)? Sooq "ammasuuneq isertuaatsuunerlu" periuserinagit akiumanginnerannut tunngavilersuutaa akeqquneqarpoq.

Akissut: KNI A/S-ip qullersaanut apeqqutigineqarsimasup akineqarnissaa piumasarivara. Imaattumillu KNI A/S akissuteqarpoq:

"KNI-p ilisimatitsissutigaa suliffeqarfissuarmini sulisut tamarmiusut amerlassusaat ingerlatseqatigiiffiup ukiumoortumik nalunaarusiaani saqqummiunneqartartut. Sisimiuni Sullissivimmi (qitiusumik allaffeqarfik) sulisut amerlassusaasa 2020-mit ullumikkumut ineriartorneri tullinnguuttuni takussutissami takuneqarsinnaapput:

2020: 101
2021: 107
2022: 102
2023: 101
2024 (august) 102

Atorfiit inuttaqanngitsut siuliani saqqummiussami ilaanngillat. Ilisimatitsissutigineqassaaq immikkoortorta qarfinni ataasiakkaani sulisut amerlassusaat ingerlaavartumik naleqqussarneqartarmata. Ingerlatseqatigiiffiup qarasaasiai cyber-imillu illersuutai pisoqalisimasut massakut aallunniarneqalermata IT-imik immikkoortorta qarfinni sulisut amerlineqartariaqarnerat assersuutitut taaneqarsinnaavoq. Assersuutigalugu piujuartitsinermut tunngasut isiginiarneqarnerulernerisa nalunaaruteqartussaataanerullu annertusiartornerisa kingunerisaanik piujuartitsinermut tunngasunut siunnersortimik atorfinitsitsisoqarnikuuvortaaq. Immikkoortortani allani sulisut ikilisarneqarnikuupput. Piffissami tassani Aalborgimi immikkoortorta qarfik matuneqarnikuuvortaaq pisiortornernut assartugassanullu tunngatillugu suliassat Sisimiuni Sullissivimmit isumagineqalerlutik."

Tamatuma saniatigut ingerlatseqatigiiffiup ukiumoortumik nalunaarusiarisartagai innersuussutigissavakka, tassani ingerlatseqatigiiffiup aaqqissugaaneranut ingerlatsineranullu tunngasut paasissutissiissutigineqartarmata.

Apeqquut 2. Inuiaqatigiit suliffeqarfiutaanni "allaffeqarfissuarmi/qullersaqarfimmi" atorfillit amerlassusaasa ilisimatitsissutiginiissaannut inatsisitigut aporfeqarpa?

Akissut: Ingerlatseqatigiiffiit Namminersorlutik Oqartussanit pigineqartut immikkoortortamik qanoq sulisoqartiginerinik ilisimatitsissuteqartarnissaannut inatsisitigut aallaavittut aporfissaqanngilaq.

Apeqquut 3. Inuiaqatigiit suliffeqarfiit pigisaanni allani, soorlu Royal Greenland A/S-imi, siornatigut "allaffeqarfissuarmi/qullersaqarfimmi" sulisut amerlassusaat partiimi allameersumut Inatsisartunut Siumumit ilaasortaasumut tamanut ammasumik saqqummiunneqartarnikuuppat (soorlu § 37, nr. 2023-66)?

Akissut: Aap.

Apeqquut 4. KNI A/S ukiumoortumik nalunaarummi akuerineqartoq kingulliusumi (2022-2023) ilaatigut angutit arnallu atorfillit amerlassusiinik assignngitsunik kisitsiseqarpoq, soorlu "lkummatissaqarnermik ingerlatsivimmi" angutit atorfillit amerlassusaat 17-iunerarpaat, taamaammat apeqqutigerusunnarpoq: Angutit arnallu qanoq amerlatigisut KNI A/S qullersaqarfiani atorfeqarpat? Akerusunneqanngippat, sooq paasissutissanik assignngisitsisoqarnera nassuiaqquneqarpoq.

Akissut: Matumani § 37 naapertorlugu apeqqutigineqartut akiniarneranni tassunga atugassanik KNI A/S-imit akissutissanik pissarsiniartoqarsimavoq, imaattunillu akissuteqarpoq:

"Arnat 49-t angutillu 53-t augustimi Sullissivimmiipput. Paasissutissanut ilanngullugu aamma ilisimatitsissutigineqassaaq pisiniarfimmi pisortat niuertullu massakkut 47 arnaasut aamma 18-t angutaasut"

Apeqquut 5. Naalackersuisut, Naalackersuisoqarfiit ataaniittullu, KNI A/S qullersaqarfiup sulisuisa qanoq amerlassuseqarnerinut ilisimannittoqarpa? Taamaanngippat, suliffeqarfimmi peqquserluffiunikooqisumi paasissutissat nalinginnaasuugaluartut ilisimasannginnerinut nassuiaassisoqarnissaa piumasarineqarpoq.

Akissut: Ingerlatseqatigiiffiit qullersaasa ukiumoortumik nalunaarutit aqqutigalugit sulisumik amerlassusiinik nalunaarutigisartagaat naapertorlugit Naalackersuisut ilisimatinneqartarput.

Apeqquut 6. Ingerlatseqatigiiffik inuiaqatigiit pigisaasa “suliatic aqutsinertillu pillugit paasissutissanik tamanut saqqummiusisarnerisigut, Namminersorlutik Oqartussat aktianik ingerlatseqatigiiffii isertuaatsuussasut” Naalakkersuisut ”tunnngaviusumik” isumaqatigaat?

Akissut: Aktiaateqarluni ingerlatseqatigiiffiit Namminersorlutik Oqartussanit pigineqartut Naalakkersuisut piginnittutut isumaqatigiissutaani Inuit Ataqatigiinnit, Siumumit, Demokraatinit Atassumillu peqataaffigineqartumi piginnittuunermi politikiminni pingaartitativik arfineq pingasut nalunaarsorsimavaat. Taakku akornanniilluni isertuaatsuuneq ammasumillu pissuseqarnissaq. Ingerlatseqatigiiffiup ingerlatsinermi tunnngavii ajoqusinngikkaluarlugit, Namminersorlutik Oqartussat aktianik piginneqatigiiffii ingerlatseqatigiiffiup aqutsisui pillugit sapinngisamik ammasariaqarput, aammattaaq ingerlatseqatigiiffiup ingerlatsinera aqutsisuilu pillugit paasissutissanik sapinngisamik amerlanerpaanik tamanut saqqummiussisarlutik.

Apeqquut 7. KNI A/S-imut Naalakkersuisoq sorleq piginnittut sinnerlugit akisussaasuutinneqarpa?

Akissut: *“Aktiaateqarluni ingerlatseqatigiiffinnik Namminersorlutik Oqartussanit pigineqartunik isumaginnineq”* suliassaqarfinnik agguataarisimaneq naapertorlugu Naalakkersuisut Siulittaasuanit akisussaaffigineqarpoq. Naalakkersuisuni ilaasortat akisussaaffiligassaanik agguataarisarneq Inatsisartuni Naalakkersuisunilu ilaasortat pillugit Inatsisartut Inatsisaanni § 23, imm. 1 naapertorlugu Siulittaasup akisussaaffigaa. Ingerlatseqatigiiffimmik periusissiatigut pingaarnertut ineriartortitsinerit pillugit Naalakkersuisut piginnittutut akisussaaffeqaannaratik, assersuutigalugu kiffartuussinissamik isumaqatigiissusiornermik oqartussat suliassaat aamma akisussaaffigaat. Taamaalilluni Nunalerinermut, Imminut Pilersornermut, Nukissiutinut Avatangiisinullu Naalakkersuisup Kalistat Lundip, aningaasanut inatsimmi 73.04.10 Nioqqutissanik pilersuineq aningaaseriveqartitsinerlu (ilassutitut aningaasaliissutit) akisussaaffigai. Sinaakkutissatut isumaqatigiissut, tamannalu pillugu Namminersorlutik Oqartussat aamma KNI A/S akornanni kiffartuussinissamik isumaqatigiissut tunuliaqutaralugit Nunaqarfinnut, isorliunerusunullu nioqqutissanik pilersuinerup attatiinneqarnissaanut aningaasartuutit matussutissaatutt aningaasaliissutit aningaasaliissutigineqartarput.

Inussiarnersumik inuulluaqqusillunga


Mute Bourup Egede